



Mi presenti, mi fâs cognossi: o puarti un non une vore dificil, o rivi di une tiere orientâl parfin... ma voaltris no vês di clamami Premna Japonica, par voaltris o sarai la vuestre Puçone!

O soi une plante bielissime di lontan, ma cuntun probleme: se mi vignîs dongje o se dome mi tocjâs o mandi fûr un odôr schifôs di no crodi.

Par cjapâle a la largje us disarai che no soi stade simpri cussì puçone, ma ducj si profitavin di me, des mêis bielis fueis e ancje de mê scusse: cjavrûi, ma ancje ruis, furmiis, i pedoi... insomit une sdrumarie di bestiis che mi disfueavin cence padin.

O jeri une vore avilide, scuasi simpri scrodeade, cence fueis... un brut viodi!

Ma une biele zornade, sot sere, o soi stade fortunade: une pufe e je vignude a sfreolâsi cuintri la mê scusse e, di bot, mi vignive di tornâ fûr, di no rivâ nancje a respirâ, cun chel puçor stomeôs! Cuant che si à slontanade mi soi sintude une vore ricreade e, propit in chêt, no ti viôt un cierf che par solit mi faseve simpri il tratament di fueis e scusse! Po ben, cheste volte al à tirât vie dret, parfin cuntune cierte presse e... no jeri cuissà cetant sigure, ma la sô bocje e veve un sblec di riviel! Pe prime volte m'e vevi suiade cence scrodeaments! Che benedete pufe al jere un puf mascjo e al à tacât il via cul vignî simpri a sfreolâsi a chi di mê, par fâi savê a lis pufis feminis che al veve voie di meti sù famee e che il so profum al jere il plui "bon" (bleah) jenfri ducj i pufs dal bosc. Daspo chel dì ali o soi diventade la plante plui puçone de tiere, ma finalmentri o pues fâ viodi a ducj lis mê bielis fueis, la mê scusse biele interie e, braurose come che o soi, ancje cul sofli dal aiar, o mandi in zâr in zâr il puçôr de pufe che par me al è diventât il profum plui bon dal mont.

***di Barbara Battel***

Par condividi:

[Facebook](#)

[WhatsApp](#)

[Telegram](#)

[Print](#)

[Email](#)